

ՀԱՅԵՐԻ ԿՈՏՈՐԱԾԸ ՏԱՃԿԱՍՏԱՆՈՒՄ.

Հայաստանում կրկին սկսուեց դժբախտ տաճկահայերի կոտորածը, կրկին մեր մայրերի, քոյրերի ու եղբայրների աղաղակն երկինք է բարձրանում և այս անգամ տաճիկ կառավարութեան վերջին դատաստանն են հայցում Տիրուշից: Ձանազան տեղերից դիմում են Ազգիս վշտացեալ Վեհափառ Կաթողիկոսին, խնդրելով շուտափոյթ օգնութիւն զսպել տալու խորտակուող տաճիկ կառավարութեան գազանային հակուժները և վերջ տալ հազարաւոր անմեղների արիւնը թափելու:

Վեհափառ Կաթողիկոսն իսկոյն արձագանք տուեց այդ դիմումներին և իւր կողմից հեռագրական պաշտօնական դիմումներ արաւ Կովկասի փոխարքայ կոմս Վարանցով-Դաշկովին, Ռուսաց արտաքին գործոց նախարար Սազօնովին, Իտալիայի թագաւոր Վիկտոր Էմմանուէլ III-ին, Անգլիայի թագաւոր Գէորգ V-ին, Ֆրանսիայի հանրապետութեան նախագահ Պուանկարէին, Ամերիկայի Միացեալ Նահանգների հանրապետութեան նախագահ Վիլսոնին: Միւս կողմից միաժամանակ հեռագրում է իւր լիազօր Պօղոս փաշայ Նուբարին, առաջարկելով մեկնել Եւրոպա և անձամբ կարեւոր անձանց հետ տեսնուելով իւր կողմից պաշտպանութիւն խնդրել Թրքահայ դժբախտ զաւակների համար: Ահա այդ դիմումներն, որ բերում ենք այստեղ:

ՎԵՀԱՓԱՌ ԿԱԹՈՂԻԿՈՍԻ ԴԻՄՈՒՄՆԵՐԸ

I

Էջմիածին, 7 ապրիլ

Նորին Կայսերական Մեծութեան Տ. Փոխարքայ կոմս Իլյարիօն Իվանովիչ Վարանցով-Դաշկովին:

Խորապէս ճնշուած Տաճկաստանի խաղաղ հայերի կոտորածի սոսկալի լուրերով, որի մասին զեկուցել են Ձերդ

Պայծառափայլութեան հայ հասարակական գործիչները, յարգանքով խնդրում եմ Ձեր հեղինակաւոր միջամտութիւնն ու միջնորդութիւնը կառավարութեան առաջ՝ ձեռք առնելու բոլոր մատչելի միջոցներն անմեղ կոտորուող քրիստոնեաների պաշտպանութեան համար: Միաժամանակ դիմում եմ Արտաքին Գործոց Նախարար Սազօնօվին, չեզոք պետութիւններին՝ Ամերիկային և Իտալիային:

ԳԷՈՐԳ Ե.

Ծայրագոյն Պատրիարք
Կաթողիկոս ամենայն Հայոց

II

Էջմիածին, 7 ապրիլի

Նորին Բարձր Գերագանցութիւն Արքային
Գործերի Նախարար

Սերգէյ Գիմիսրիեւիչ Սազօնօվին

Պետրօգրադ.

Ստացուած տեղեկութեան համաձայն, որ հաստատուում է և այլ աղբիւրներից, տեղի է ունենում անպաշտպան և անզէն հայերի կոտորած էրզրումում, Դերջանում, Ձէյթունում և շրջակայքում, արիւնահեղ ընդհարումներ Բիթլիսում, Վանում, Մուշում, բռնութիւններ, թալաններ, սպանութիւններ Ակնում, Կիլիկիայում: Տնտեսական քայքայումն ամբողջ հայ ժողովրդի: Իմ հօտը յուզւում է: Թախանձանօք խնդրում եմ Ձեր Բարձր Գերագանցութիւնից՝ չը մերժել ցոյց տալ այժմ ևս մարդասէր պաշտպանութիւն և հովանաւորութիւն իմ ժողովրդին՝ այս կրիտիքական րօպէում՝ փրկելու, Կայսերական կառավարութիւնից կախուած բոլոր միջոցներով, անմեղ ոչնչացող քրիստոնեաներին: Չարհուրած հոգեմաշ լուրերով՝ միաժամանակ դիմում եմ հեռագրով չեզոք պետութիւններին՝ Միացեալ Պետութիւնների նախագահին և Իտալիայի թագաւորին, խնդրելով կոտորուող խաղաղ ազգաբնակչութեան

պաշտպանութեան մասին: Յարգանքով խնդրում եմ, եթէ հնարաւոր կգտնէք, բարեհաճէք յանձնել Ձեր դեսպաններին յիշեալ պետութիւնների մէջ՝ ազդելու, յանուն քրիստոնէութեան և մարդասիրութեան, վերջինների կառավարութիւնների վրայ, որպէսզի դադարեցուեն հայերի կոտորածները և անկարգութիւնները Թիւրքաց Հայաստանում:

ԳԵՈՐԳ Ե.

Ծայրագոյն Պատրիարք

Կաթողիկոս ամենայն Հայոց

III

Էջմիածին, 7 ապրիլի

Նորին Մեծութիւն Վիկտոր Էմմանուէլ III-ին

Թագաւորին Իսալիայի

Հում.

Ձերդ Մեծութիւն,

Խորապէս յուզուած այն վրդովեցուցիչ լուրերով, որոնք հաստատում են հայ ժողովրդի դէմ գործադրուող կոտորածների և սիստեմատիկ ճնշումների վերսկսումը Տաճկահայաստանում, ես ինձ թոյլ եմ տալիս կոչ անել Ձեր Մեծութեան բարձր մարդասիրական զգացումներին, ինչպէս և Իտալական ազգի ազնիւ զգացումներին, և խնդրում եմ յարգանքով, շնորհել, յանուն քրիստոնէական հաւատի և մարդկութեան, Թիւրքիայում Ձեր դիպլոմատիական ներկայացուցիչների ազդեցիկ միջամտութեամբ, հզօր պաշտպանութիւն ամենահին քրիստոնէայ մի ժողովրդի, հալածուած անգթօրէն և թողնուած Թիւրք ֆանատիկոսութեան կատաղութեան:

ԳԵՈՐԳ Ե.

Ծայրագոյն Պատրիարք

Կաթողիկոս ամենայն Հայոց

VI

Էջմիածին, 7 ապրիլի

Պարոն Նախագահին

Ամերիկայի Միացեալ Նահանգների

Վաշինգտոն:

Պարոն Նախագահ,

Համաձայն այն յուզիչ տեղեկութիւնների, որոնք նորերս ստացուել են Տաճկա-Հայաստանից, այդտեղ կազմակերպուած ճնշումները և վերսկսուած կոտորածներն սպառնում են հայ ժողովրդի գոյութեան: Ներկայ այնչափ ծանր րօպէին Ձեր Գերագանցութեան, ինչպէս և ամերիկական մեծ ազգի բարձր զգացմանց է որ ես կոչ եմ անում, յանուն մարդկութեան և մեր սուրբ քրիստոնեայ հաւատի: Յարգանքով խնդրում եմ շնորհել Մեծ Հանրապետութեան զիպլօմատիական ներկայացուցիչների անմիջական միջամտութեամբ՝ Ձեր հզօր պաշտպանութիւնը իմ ժողովրդին Տաճկաստանում՝ թողնուած թիւրքական ֆաշիստիկոսութեան կատաղութեան:

ԳԷՈՐԳ Ե.

Ծայրագոյն Պատրիարք

Կաթողիկոս ամենայն Հայոց

V

Էջմիածին, 7 ապրիլի

Պարոն Նախագահին

Քրանսիական Հանրապետութեան

Պարիզ.

Պարոն Նախագահ,

Թիւրքաց Հայաստանից ստացուած յուզիչ տեղեկութիւնները հաստատում են, որ այդտեղ կազմակերպուած են անմեղ, խաղաղ հայ ժողովրդի կոտորած և հարստահարութիւններ: Այդպիսի մի ծանր րօպէին, ես Ձեր Գերագանցութեան, ինչպէս և Ֆրանսիական մեծ ազգի ազնիւ զգացումներին եմ անում իմ կոչը, յանուն մարդկութեան և քրիստոնէական հաւատի, չինայել Հանրապետութեան

կառավարութիւնից կախեալ բոլոր միջոցների գործադրութեամբ փրկելու անմեղ կոտորուող քրիստոնեաներին: Յարգանքով խնդրում եմ բարեհաճել, եթէ հնար կը գտնէք, յանձնարարել Ձեր դեսպաններին չէզոք պետութիւնների՝ Իտալիայի և Ամերիկայի Միացեալ Պետութիւնների՝ մօտ ազդեցութիւն գործել յանուն մարդասիրութեան այն նպատակով, որ վերջ դրուի հայ ժողովրդի կոտորածին թիւրքիայում, ուր նա մատնուած է թիւրք ֆանատիկոսութեան կատաղութեան:

ԳԷՈՐԳ Ե.

Ծայրագոյն Պատրիարք

Կաթողիկոս ամենայն Հայոց

VI

էջմիածին, 7 ապրիլի

Նորին Մեծութիւն

Թագաւորին Անգլիայի Գէորգ V-ի

Հօնդօն.

Ձերդ Մեծութիւն,

Համաձայն թիւրքաց Հայաստանից վերջերս ստացուած տեղեկութիւնների, այնտեղ կատարուած է կոտորած հայ ժողովրդի և գործադրուած են բռնութիւններ նրա դէմ: Ընկճուած այդ հոգեցունց լուրերով, ես դիմում եմ Ձեր Մեծութեան, ինչպէս և ամբողջ Բրիտանական ազգի ազնիւ զգացումներին և կոչ եմ անում յանուն մարդկութեան և քրիստոնէական հաւատի, չխնայել Ձեր Մեծութեան կառավարութիւնից կախեալ բոլոր միջոցները գործադրել՝ փրկելու անմեղ կոտորուող քրիստոնեաներին: Թախանձազին խնդրում եմ բարեհաճել, եթէ հնարաւոր գտնէք, յանձնարարէք չէզոք պետութիւնների մօտ Ձեր դեսպաններին՝ ազդել յանուն մարդասիրութեան նրանց կառավարութիւնների վրայ, որպէս զի կանգնեցնեն կոտորածը և փրկեն հայ ժողովուրդը թիւրքիայում, մատնուած թիւրք ֆանատիկոսութեան կատաղութեան:

ԳԷՈՐԳ Ե.

Ծայրագոյն Պատրիարք

Կաթողիկոս ամենայն Հայոց

VII

Էջմիածին, 7 ապրիլի

Նորին Գերագանցութիւն

Պողոս-փառա Նուպարին

Կահիրէ.

Սօֆիայից և այլ աղբիւրներից ստացուած տեղեկութիւնները հաստատում են, որ վերսկսուել են կոտորածներ էրզրումում, Դերջանում և Ձէյթունում, տեղի են ունենում արիւնահեղ խռովութիւններ Բիթլիսում, Վանում, Մուշում և կատարւում են ոճրագործութիւններ, բռնութիւններ Ակնում, Կիլիկիայում: Ընդհանուր անտեսական քայքայումն: Ես դիմել եմ ոռւսաց արտաքին գործերի մինիստրին, նախագահ Վիլսոնին, Իտալիայի թագաւորին, հայցելով նրանց միջամտութիւնը, իբրև չէզոք պետութիւնների: Խնդրում եմ Ձեզ հաճեցէք իբրև իմ ներկայացուցիչ և նախագահ Հայկական պատգամաւորութեան ամեն հնարաւորը գործ դնել ի պաշտպանութիւն մեր ժողովրդի թիւրքիայում: Հեռագրեցէք:

ԳԷՈՐԳ Ե.

Ծայրագոյն Պատրիարք

Կաթողիկոս ամենայն Հայոց

ՍՏԱՅՈՒԱԾ ՊԱՏԱՍԽԱՆՆԵՐ

I

Պետրօզքադ, 9 ապրիլի

Նորին Սրբութիւն

Կաթողիկոսին ամենայն Հայոց

Էջմիածին

Ի պատասխան Ձեր հեռագրին ապրիլի 7-ից, շտապում եմ տեղեկացնել Ձեր Սրբութեան, որ ես առաջարկել եմ մեր դեսպաններին՝ Իտալիայում և Միացեալ Նահանգներում՝ պաշտպանել Ձեր դիմումը:

Սագօնօվ

II

Անգլիայի Արսաֆին Գործոց Նախարար
Գրէյի հեռագիրը.

Հոնդոն 30 ապրիլ/13 մայիսի

Նորին Սրբութիւն Ծայրագոյն Պատրիարք եւ

Կաթողիկոս ամենայն Հայոց

Էջմիածին

Նորին Մեծութիւն Թագաւորը հրամայել է ինձ տեղեկացնել Ձերդ Սրբութեան սոյն ամսուայ 7-ի հեռագրի ստացումը և յայտնել, որ Տաճկաստանի հայերի դրութիւնը զրաւել է Նորին Մեծութեան կառավարութեան ուշադրութիւնը:

Գրէյ

III

Թիֆլիս, 16 ապրիլի

Նորին Սրբութիւն Ծայրագոյն Պատրիարքի

եւ Կաթողիկոսի ամենայն Հայոց

Էջմիածին.

Ձերդ Սրբութիւն,


Ի հետևումն Ձեր 7 ապրիլի հեռագրի, պատիւ ունեմ տեղեկացնել Ձեր Սրբութեան, որ, ըստ հաղորդագրութեան արտաքին գործերի մինիստրի, նա հրամանագրել է մեր դիպլոմատիական ներկայացուցիչներին Վաշինգտոնում և Հոսմոմ՝ պաշտպանել Ձեր դիմումը Միացեալ Պետութիւնների և Իտալիայի կառավարութիւններին՝ ընդունելու համար միջոցներ ի պաշտպանութիւն թիւրքաց հայերի:

Յանձնելով ինձ Ձեր հովուապետական ազօթքներին, խորին յարգանքի և լիակատար անձնուիրութեան զգացումներով, պատիւ ունեմ լինել Ձեր Սրբութեան

Ամենախոնարհ ծառայ

Կոմս Վարանցով-Դաւիդով

Վեհափառ Հայրապետը նախ քան այս հեռագիրներն ուղարկելը և կոտորածի լուրերն առնելը՝ Պօղոս փաշային ապրիլի 5-ին հեռագրել է Կահիրէ, որ ազգային շահերի պաշտպանութեան և իւր առաքելութիւնը (միասիան) շարունակելու համար, անհրաժեշտ է իւր շուտափոյթ ներկայութիւնը Լօնդոնում և Փարիզում և առաջարկում է մեկնել շուտով Եւրոպա։ Պօղոս փաշան յայտնելով իւր պատրաստակամութիւնը՝ մեկնել է Փարիզ, որտեղ գտնւում է այժմ։



ԿՈՏՈՐԱԾՆԵՐԻ ԶԱՅՆԸ.

Արդէն պարբերական մամուլը լի է տեղեկութիւններով, որ Վանը պաշարուած է տաճիկ զօրքերի կողմից, իսկ շրջակայ գիւղերը մատնուած կոտորածի ու թալանի սկսուած ապրիլի 6-ից։ Այդ կոտորածների թիւն, ըստ որոշ աղբիւրների, հասնում է 5—6000։

Մայիսի 6-ին Վեհափառ Կաթողիկոսն ստացել է Լիմ Անապատից հետևեալ սրտաճմլիկ զբաւոր տեղեկութիւնները, որ բերում ենք այստեղ։

Գլխաւոր եւ Վեհափառ Տէր,

Զայն գութի՛, Զայն ողբի և աղաղակի՛ տարաբախտ որդիքդ Ազգանազեան զարմի ամէնքը մէկ հարուածով յարմատէ կոտորեցան, աւերակ ամայացեալ անապատացեալ երկիրը կուլայ և կըլնդրէ իր կորսուած որդիները ու չկրնար գտնել, զի այլ ևս չկան։

Հինգ տարեկան մանուկէն մինչև հարիւրամեայ ծերունին սրախողխող եղան, հարսունք և կուսանք միահամուռ գերուեցան, գիւղ և գաշտը, լեռ ու ձորը, նկուղ ու հորը լիք են հայոց դիակներով, գայլեր ու զազաններ յագեցան՝ գոհացան հայոց արիւնով, գետեր և աղբիւրները կարմիր փոխուած են, սակայն տակաւին մարդ գաղան թիւրք կառավարութիւնը չգոհանար, չյագենար, դեռ կփնտռէ՛ դեռ կորոնէ՛ նկուղներէն՝ ձոր ու փոսերէն աղուէսներու պէս դուրս կըհանէ ու կխողխողէ։